

玄覽堂叢書

第三十八冊

聖明定奪勅下該部再加詳議如欲舉行  
未寒凍擇日興工若至冰堅停止來  
天煖土融隨即繼工務在肆月工成不悞糧  
運緣係計處

國儲以永圖治安及節奉

欽依著戶工貳部各委堂上官壹員會同漕運總  
兵叅將并原經委錦衣衛都指揮王佐及舉  
奏這事御史吳仲等親詣彼處地方稽查先  
今議處事宜踏勘地形高下計筭所費工力

通志卷一  
三十一  
究竟修否得實利害明白具奏定奪事理臣  
等俱未敢擅便等因奉

聖旨是修濬通惠河乃前人遺跡

先朝成筭近年屢議修復輒為姦豪射利之人所  
阻今閘壩具存河渠無礙原設官吏夫役俱各  
見在你每今所議處尤為簡易合用錢糧不多  
且車舟並進不失車脚之利壹應疏濬盤剝修  
閘造船等項事宜都依擬施行然政之修舉必  
在得人兵部便會戶部推舉曾歷漕事練達老

成都指揮壹員照例充叅將通州住劄照舊驗收輕齎銀兩兼理修河事務吏部仍會戶工貳部推有才力肯任事郎中貳員并通州巡倉御史各寫勅與他行事未盡事情聽該部并各官從宜處置事體重大者具奏定奪今冬先將木植執石等項置辦整理待來春融煖之時興動土工委用官員務要用心協力共成大功勿得偏執違拗妨悞經國大計責有所歸欽此

嘉靖陸年拾壹月拾叁日



巡按直隸監察御史等官臣吳仲等謹

題為計處

國儲以永圖治安事臣欽奉

勅監察御史吳仲國家漕運仰給東南裏河自真揚直抵張家灣閘壩洪淺具有成規惟通州地方距京城纔伍拾餘里車挽之費動至鉅萬每或不給未免稱貸償完運軍之疲敝日甚江南之加耗歲增先年臣下建白以通惠河乃前代遺蹟

先朝具有成筭成化年間以來屢嘗修濬運糧船隻曾直抵慶豐閘下乃為異議所撓事遂中止其後節嘗興舉亦皆感於姦人橫議迄無成功近日廷臣有以為言朕命戶工貳部侍郎會同漕運總兵叅將等官及原經委用修濬河道錦衣衛都指揮王佐等前去踏勘議處各官回奏朕叅詳始末事情今閘壩具存河渠有水原設官吏夫役俱各見在各官所處運糧大船雖未能直達剝船轉搬亦可省費拾之叅肆因舊修

濬隨宜幫築合用錢糧人力不多且夏秋晴爽之時水陸並運不失車脚之利糧船過盡商民船隻亦可通行若處置得宜委的有益無損經久利便已允所請施行今特命爾同戶部郎中尹嗣忠工部郎中何棟會同叅將都指揮僉事陳璠親詣沿河壹帶查照該部原覆各官勘處事宜著實用心整理應修工程合用錢糧雇募人夫并起撥通州等衛遮洋運糧軍餘及禁革姦弊等事悉依原擬各該府衛州縣訪有能幹



的當官員爾等會委差用不許抗違阻撓今冬  
辦料計工區畫停當來春融煖之時擇日興動  
土工凡各項事情有該載不盡者仍聽該部并  
爾等從宜處置事體重大者具奏定奪此係經  
國大計爾等務要用心協力共圖成功勿偏執  
自用勿違衆立異亦勿苟且粗略取辯目前壹  
勞永逸以為深長久遠之圖斯稱委任工完具  
奏朝廷委官闕實尚加擢用以旌爾能如或因  
循玩愒徒費工力無益於事責亦難逭爾其勉

之慎之故勅欽此欽遵臣等深愧匪才叨膺重  
託受

命以來日夜憂懼恐孤任使自本年貳月初肆日  
起沿河往來親督委官夫匠將大通橋至通  
州壹帶河道橋梁閘壩堤岸官廳廠房俱已  
修濟蓋造完備蓄積水利分布利船交盤糧  
運通行無阻此皆仰賴

皇上剛明獨斷克有成功臣等身歷此河頗知功  
之難成竊念時之難遇即今雖已通行持久

恐將廢阻謹陳愚得用條事宜伏乞

聖明特勅該部采擇處分務使河道長通

國儲永賴以成萬年之利臣等不勝幸甚為此  
具本差攢典張鑑親齎謹題請

旨

計開

壹時修濬以通運道臣等切照大通橋

起至通州石壩肆拾餘里地勢高下

肆丈有餘中間設有慶豐等伍閘蓄

積水利臣等督工修濬今已行船運糧無阻但地勢陡峻土皆流沙猶恐夏秋天雨河流暴漲堤岸河身不無衝決淤塞若不預處恐難經久如蒙乞

勅該部行令管閘主事時常沿河往來巡視壹遇堤岸水口衝決河道淤塞隨即率領官吏閘夫挑濬補築晝夜撥人看守毋致盜決仍將閘運扣省腳價銀內

每年量支壹阡兩通州寄庫遞年聽候管閘主事將前銀兩雇覓人夫置買椿料乘暇興工量其衝決淤塞處所重加修濬如銀兩不足再行具數奏討如此庶成功不廢而運道永通矣

壹專委任以責成效臣等切見張家灣至真揚壹帶河道置立淺鋪僉設夫老附近府州縣各有管河官員分治

又有管河郎中御史等官總理至於  
設閘處所俱有主事專管坐守是以  
河防政務僅無廢墜今都城之下大  
通獨河北之他處尤為緊要止設主  
事壹員又兼管別事不無妨廢如蒙

乞

勅該部計議合無將管閘主事照依濟寧等處事  
例通州住劄不許入京專令督理河  
道不許兼管別事通州添設管河同

知或判官壹員專管修理大通橋起  
至鮮魚閘止河道其合用錢糧將每  
年扣省腳價銀內支用與凡應行事  
宜及委用官員俱聽管閘主事處分  
其有盜決水利阻壞糧運之徒亦聽  
舉問重治仍乞

勅戶部每年參月初旬差委郎中或員外郎壹員  
請

勅壹道通州任劄會同巡倉御史沿河往來催儻

天津以北糧運驗筭輕齎銀兩待糧完日造冊奏繳如此則職任專壹而效可責成矣

壹復舊額以添官夫臣等看得大通關

河石額設官肆員吏肆名關夫陸百

柒拾肆名後因糧運不行止存官壹

員吏壹名看守關座續又因接運事

添增夫捌拾名每名河南等處州縣

徵銀柒兩解部雇夫專管運送



內府衙門竹木等料閘運停止無事修濬啓閉  
官吏夫役因此革少即今幸賴

聖明修復閘運前項官夫似不可少如蒙乞

勅該部查照舊額量添閘官壹員吏壹名分管其

閘夫量添壹百名與同見在壹百捌

拾名分布各閘不許雜差占役專力

啓閉如遇堤岸河道少有淤決官吏

率領各夫併力修濬其餘外夫捌拾

名原係接運事合無再加詳議將原

徵解部銀共伍百陸拾兩不必雇夫  
收貯在庫待候南京歲運竹木等料  
至日本部驗實每運量給銀兩令經  
收

內府衙門官壹員領出自雇車脚通州陸運不  
許入閘庶閘夫不致重累又運船與  
木料兩不相妨如此則閘運易舉而  
夫役不擾矣

壹改閘座以防水土臣等看得夏秋久

雨西山水發皆由閘河東流閘門隘

小水泄不及遂致泛漲衝決堤壩勢

所必有此出不測非人可為原議障

水石壩今已修成又通流閘在通州

城中市井環繞積水丈餘又西水關

久浸水中俱非常便必須將慶豐上

閘平津中閘拆運通州西水關外創

造石閘壹座將前石壩南移貳拾餘

丈改造石閘壹座平時閉版積水壹

遇水發即啓版泄水深為兩便但今糧運已行措工不及如蒙乞

勅該部再加斟酌如果於事有益待糧運完日行令管閘主事會同漕運衙門把總部指揮壹員陸續辦料如法改造如此庶事得經久而水患可免矣

壹處剝船以便糧運臣等看得原議漕運衙門打造剝船叁百隻每隻原定價銀叁拾伍兩共銀壹萬伍百兩今

已分佈各閘責令經紀張鑑等壹百  
貳拾名領運將經紀名下腳價銀內  
每年扣出叁仟兩在官抵作船價計  
叁年半扣完其船遞年修艙經紀自  
備若損壞不堪撐駕仍將前扣船價  
發漕運衙門打造照前給領扣除庶  
不悞事又每閘該船陸拾隻每隻載  
米壹百伍拾餘石每日可運米貳萬  
餘石自伍月起至玖月終止糧運續

到計有壹百伍拾日中間縱有陰雨  
阻滯則每年京糧不過貳百伍陸拾  
萬石亦可盡入閘運不難矣臣等已  
運過米拾柒萬餘石即此可驗若以  
後妄生浮議多方阻撓以致糧運遲  
滯蓋由接管官員不肯任事非河之  
弊臣等之責也如此則事體歸壹而  
糧運無虞矣

嘉靖柒年伍月貳拾貳日具題次日奉

聖旨開濬通惠河

先朝屢經勘議修理未得成功吳仲何棟尹嗣忠  
陳璠等不出參肆箇月工程就緒糧運通行勤  
勞可嘉還照前旨差科道官各壹員前去閱視  
回奏以憑旌獎其餘合行事宜工部便照各官  
奏內事理議了來說欽此

嘉靖柒年伍月貳拾柒日

巡按直隸監察御史臣吳仲謹

題為計處

國儲以永圖治安事臣奉

命整理通惠開河除工完會本具

奏外臣身歷河事始知成功不易持久為難先

年所以屢行屢止者有以也若不添設專官

坐守開壩隨時修理未免淤塞崩潰終當自

廢萬壹張家灣射利之徒夤夜偷掘壩閘壩

壩可使萬夫之勞千金之費壹夕委諸泥沙



是上負

皇上獨斷之明下負輔臣贊襄之力而臣之罪始不可追謗始不可破矣臣看得工部郎中何棟才猷出衆智慮超群况身親經歷多所識達如蒙

皇上軫念漕艱乞

勅該部裁革原設主事仍留本官督理照例叁年壹次更換聽其動支在庫用剗銀兩并扣省脚價雇倩軍民夫役挑濬上流改造閘座革

經紀而撥官軍自運去崔後而添開夫自般  
嚴防山水泛漲法禁盜泄河防隨船帶石以  
包岸逐年種柳以護堤補蓋廠房填墊橋道  
并修船剝船等項俱聽便宜務為經久其天  
津壹帶河道巡河郎中寫遠罕到全欠疏通  
連年運船起剝艱難亦宜改屬本官壹併整  
理若何棟別有差用亦乞暫留必待新任郎  
中交代接管方許離任蓋此河不可壹日無  
工部之官而工部官實不可壹日離此河也

再照各處河道俱設有有司水利官今通惠  
閘河似不可缺臣訪得通州左衛經歷趙翬  
勤謹詳慎神武中衛經歷岑時勉穎敏精勤  
曾委修河俱肯效力併乞

勅下該部改陞壹員或同知或判官填註通州專  
管河道庶大小各有所司而上下方成體統  
矣其督運官壹節賴有郎中尹嗣忠多方調  
度稍有次第但立法之初事多紛擾人未慣  
習乞照侍郎王軌等題

准事理仍留本官坐守催督終始其事以後年分  
恐亦不必專設每年貳月請差郎中或員外  
郎壹員前去會同工部郎中巡倉御史督運  
完日回京似為穩便又輕齎必責之憲臣而  
弊除河道必責之水曹而事舉叅將之官恐  
不得常如陳璠之練達老成反政出多門而  
紛更矣但將來剝船編入漕司改軍自運必  
須設有專官方為久計乞

勅該部從長計處或待漕運會議定奪非臣所敢

輕議也雖然設官易任事難前項官員若不  
分住公署著實用心幹辦但高坐京師奔走  
人事祇以文移從事則關運決然不久而冗  
員真為徒設矣臣過慮之私壹得之愚又不  
敢不盡言而預告之也等因奉

聖旨工部看了來說

嘉靖柒年陸月初貳日

工部左侍郎臣何詔等謹

題為計處

國儲以永圖治安事該都水清吏司柴呈奉本部送工科抄出工科等衙門左給事中等官黎良等題該工部手本該本部題都水清吏司案呈奉本部送於工科抄出

欽差巡按直隸監察御史等官吳仲等奏奉

聖旨開濬通惠河

先朝屢經勸議修理未得成功吳仲何棟尹嗣忠

陳璠等不出參肆箇月工程就緒糧運通行勤勞可嘉還照前旨差科道官各官員前去閱視回奏以憑旌獎其餘合行事宜工部便照各官奏內事理議了來說欽此欽遵抄出送司案呈

到部嘉靖柒年陸月拾貳日該本部覆題奉聖旨是欽此欽遵備行到科該工科都給事中張嵩具題本年陸月拾陸日奉

聖旨著黎良去欽此續該都察院太子太保兵部尚書兼本院左都御史李承勛等具題亦為

前事本年陸月貳拾日奉

聖旨著劉模去欽此臣等俱於本年陸月貳拾柒

日早

朝辭畢前往大通橋駕小舟而行經慶豐上下  
貳閘平津上下貳閘至普濟石壩而止每閘  
及壩皆捨舟步履逐壹閱視凡其甄石之甃  
結木版之啓閉河水之盈縮蓄洩皆諮詢而  
講求之以至於臨閘有廳棲糧有房障隄有  
椿跨岸有橋遠近相望聯絡不絕其剗船分



布於各閘候者鱗次行者魚貫由通州而抵  
京倉可朝發而夕至具見御史吳仲郎中何  
棟尹嗣忠叅將陳璠等官仰體

皇上勵精圖治之盛心故能同心協力通變宜民  
不費時日而克有成效

君令臣行人存政舉固如是夫臣等聞衆口鑠金  
積毀銷骨市虎成於參人投杼起於屢至使  
當建白之初而或生壹橫議垂成之際而復  
間以讒言則今日之事去矣謂仲等何哉臣

等又聞立法固難而守法亦難昔蕭何定制較若畫壹得曹參以守之治清淨而民寧壹此先漢之所以興隆也今運道之通寔類於此伏望

皇上自今以往命官必求其人任人必專其事使運道旋淤而旋濬開壩隨損而隨修凡豪右之強梗者必置之法盜賊之竊發者必正之刑使得以展布其謀猷而不拘孿於聞見則百姓可與樂成漕運可以長通而壽

國脉保元氣於有永矣緣係計處

國儲以永圖治安及奉

欽依閱視回奏事理未敢擅便為此具本題奉

聖旨工部看了來說欽此抄出送司案查嘉靖陸

皇十年玖月內該巡倉御史吳仲題前事該本

會同戶部議擬合無戶工貳部添選委官

中或員外郎各壹員兵部推選曾經漕運練

達老成勤能都指揮壹員查照先年事例修

理開河仍會同巡倉御史俱領

勅行事糧運若到各官分投開壩坐守督運通行  
之日奏

請取回量加擢用等因題奉

欽依備咨吏部選註戶部郎中尹嗣忠本部郎中  
何棟兵部推選都指揮陳璠及巡倉御史吳  
仲俱領

勅前去整理續於今年陸月內該御史吳仲奏報  
工完糧運通行等因覆奉

欽依議擬題

准通行差委科道等官閱視去後今該前因案呈  
到部臣等看得御史吳仲郎中何棟尹嗣忠  
叅將陳璠整理通惠閘河俱有成蹟既該科  
道等官黎良等覈實前來所據各官相應旌  
獎以勵臣工合遵照前

旨但

恩典出自

朝廷非臣下所敢議擬伏乞

聖裁緣係計處

國儲以永圖治安及奉

欽依工部看了來說事理未敢擅便等因奉

聖旨各官修濬通惠閘河糧運通行國計有濟既  
該科道等官覈實具奏宜加旌獎吳仲何棟尹  
嗣忠陳璠各陞壹級吳仲何棟賞銀叁拾兩紵  
絲貳表裏尹嗣忠陳璠各銀貳拾兩紵絲壹表  
裏仍各要照舊用心督理務圖經久勿隳成工

欽此

嘉靖柒年柒月初柒日

<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>
------------	------------	------------	------------	------------	------------	------------	------------	------------

巡按直隸監察御史臣吳仲謹

題為議處輕齎銀兩事切照嘉靖柒年漕運京  
糧壹百玖拾玖萬叁阡捌百貳拾捌石肆斗  
肆升肆合柒勺柒抄肆撮已於通惠河般運  
完訖但秋深白河水涸糧船違限到遲壹時  
起剝艱難除記工挑濬及議發扣省脚價銀  
伍阡兩解赴漕運衙門打造剝船照例扣除  
還官其漕運總兵叅將等官若能嚴督各總  
依期而來相繼般運較之今年決可早完月



餘陸運真可不用矣所有該省腳價等項銀  
兩比照嘉靖伍年陸年各衛所原造花銷文  
冊扣除山東總孫機下該銀貳阡玖百陸拾  
柒兩陸錢貳分玖釐壹毫江北總劉俸下該  
銀壹萬肆阡柒百柒拾玖兩捌錢捌分捌釐  
捌毫王讚下該銀陸阡肆百柒拾壹兩伍錢  
叁分貳釐肆毫陸絲

中都總丁鉞下該銀壹萬捌百陸拾貳兩壹錢  
陸分玖釐貳毫江南總王憲下該銀柒阡玖

百玖拾 肆兩肆錢肆分貳釐玖毫徐珪下該  
銀捌阡伍拾伍兩貳錢叁分捌釐肆毫南京  
總王端下該銀壹萬壹拾貳兩玖錢伍分叁  
釐柒毫潘璽下該銀玖阡伍百玖拾肆兩捌  
錢伍分叁釐玖毫浙江總楊和下該銀貳萬  
陸阡肆百壹兩陸錢玖分叁釐叁毫湖廣總  
程鵬下該銀柒阡伍百壹兩伍分肆釐貳毫  
江西總張鸞下該銀捌阡柒百肆拾陸兩捌  
錢壹毫共該銀壹拾壹萬叁阡叁百捌拾捌

通惠河志卷五  
兩貳錢伍分陸釐陸絲已經題奉

欽依陸續解送戶部收貯節據把總等官王端等  
各呈稟前項銀兩相應照數扣除還官但運  
軍疲敝乞要寬減壹分以霑新河之惠等因  
到臣與臣所見相同但係干錢糧豈敢遽為  
輕重况壹應

恩典俱當出自

朝廷伏望

聖慈矜憫乞

勅下該部詳議將前項應扣腳價量給叁分之壹以濟其艱以厭其欲使知

隆恩曠典真出尋常萬萬矣再照各總輕齋多有不均并以後扣免之數相應酌處以為久計合無候明年漕運至日將山東總壹陸銀免扣江北等柒總貳陸銀每石扣銀叁分浙江等叁總叁陸銀每石扣銀伍分總計每石止扣銀叁分比之今年實免叁分之壹且為均平之制行之壹貳年如果閘運可久以後

年分該扣之數相應扣減歲漕加耗以少寬窮民如此庶軍民均霑實惠而閘運不為徒行矣惟復止照今擬扣收貯庫聽候別項支銷并修閘挑河等項支用又在臨時斟酌非臣所敢輕議而逆料也等因奉

聖旨該部看了來說欽此

嘉靖柒年拾月初柒日